

**Date – 30/08/2025**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Home Minister Pu K. Sapdangan rail kawng thar hawn tur chu hmasawna ropui tak a nih rualin a let zawnga ruihhlo lo luhna a ni thei tih a sawi.
2. Mizorama lakhuihthei thar tam ber Sialhawk khua chuan Lakhuihthei hralhna kawngah harsatna an tawh avangin MIFCO in quintal 170 leh kg 88 a leisak tawh.
3. Prime Minister Narendra Modia chuan vawiin khan Shanghai Cooperation Organisation Summit vawi 25-na hman turin China-a Tianjin khawpui a thleng.
4. Prime Minister Narendra Modi chuan Pathianni chawhma dar 11 hian 'Mann Ki Baat' programme a hman dawn.



**HOME MINISTER**

Home Minister Pu K. Sapdanga chuan thla thar ni 13-a Mizorama rail kawng thar hawn tur chu hmasawna ropui tak a nih rualin a let zawnga ruihhlo lo luhna a ni thei tih a sawi.

Vawiina Kolasib District leh Hailakandi District , Assam inrina hmun, Bairabi Sub-Division a tlawhnaah he thu hi sawiin Home Minister chuan rel kawng thar chu hmasawna ropui tak a nih rualin state dang atangin mikhual tam zawk rawn luhna kalkawng a hawn zauh sak dawn thu leh chumi piah lamah a let zawnga ruihhlo lo luhna kawng pakhat a nih theih thu a sawi a. Chu vang chuan dan hnuaiah Mizorama rawn lutte felfai taka chhinchhiah a an luh theih nan ILP pekchhuah kawngah fimkhur zawka hma lak a tul thu leh heng thil hrang hrangte hi a hmuna chengte nen sawiho a tul avanga vawiin pawha tlawh a nih thu a sawi a ni.

Home Minister hoa inkawmhonaah Bairabi khawtlang hruaitute chuan ILP Check Gate hi Sawrkar hnuaia dan anga changtlung zawka din a nih thuai theih nan hmalak ni se tih te, ILP Check Gate hela Tlawng dung atanga Mizoram rawn lut thin te dan nan Tlawng dunga ILP check Gate awm a tul zia thu te leh Bairabi leh a chhehvel a hnamdang ina awmhmun an lo khuar thin te dap chhuah kawngah sawrkarin chak takin hma la se an duh thu Home Minister hnenah hian an thlen a.

Heng bakah hian State dang atanga dan lova lo lutte leh dan phal loh bungrua lo lut te chak zawka dapchhuah leh ven dan kawng sawi ho a ni bawk.

He hunah hian Home Secretary Pu Vanlalmawia chuan Mizoram a Rel lo lut tur avanga Sorkar inbuatsaihna hrang hrang te sawiin, Rel Station 5 zinga 4 chu Kolasib district chhunga mi a nih thu a sawi a. Railway police din chungchang a sorkar ruahmanna hrang hrang te, ILP Counter kalpui a pawimawh dan leh ruahmanna te, hemi chungchangah sensitization neih dan tur ruahmanna siam a nih thu te a sawi lang bawk a ni.

<><><>

## **DONER OFFICIAL**

Sawrkar laipui Ministry of Development of North Eastern Region (DoNER)-a Joint Secretary (NEC) Pu Angshuman Dey chuan vawiin khan Lunglei District chhung Lungsen khuuaa oil palm chinna hmun te tlawhin, oil palm chingtute harsatna leh mamawh hrang hrang a enpui.

Pu Angshuman Dey hian oil palm chinna hmun a tlawhnaah hian oil palm chingtute dinhmun leh mamawh hrang hrang enpuiin, department hotute nen hlawk zawka oil palm thar chhuah a nih theih nana thil pawimawh hrang hrang leh hma lak dan turte an sawi ho va. Oil palm hralh chhuahna kawnga harsatna lian ber pakhat, a phurhna kawng (link road) mamawhna te a hmunah hmuhpuiin, an harsatna sut kianna tur project ngaihtuah a nih tur thu a sawi.

Kut hna thawktute nena inkawm hona hun buatsaihah Pu ey-a chuan Lunglei District chu oil palm chhinna tur ram nei tha district a nih angin awmze nei zawk leh tihtak zeta oil palm chin chu kalpui turin kut hna thawktute a chah a. An mamawh hrang hrangah inthlahrung lova department-a thawktute rawn thin tura chahin, kut hna thawktute'n an harsatna leh mamawh hrang hrang a hnena an lo thlente chu a theih anga um zui a nih tur thu a sawi bawk.

<><><>

## **BAWNGKAWN INCIDENT**

Nizana Aizawl Bawngkawn veng a insualpui silaia kaptu Rochhingpuia chu Judicial Custody-ah dah nghal a ni a, na taka a kah hliam Lalhriatrenga Siakeng chu damdawiinah enkawl mek a ni.

Police te chuan Akashvani zawhna chhangin Rochhingpuia hi dan lam thuneitute hnenah dah nghal a nih thu leh an ni rel ang anga a awm zui dawn thu an sawi a. Rochhingpuia'n a kah Lalhriatrenga Siakeng chu damdawiinah la enkawl mek a nih thu leh a hliam a nat deuh avangin hun a la duh an rin thu an sawi a ni.

Kan corr report lo ngaithla ang

VC

*Lalhriatrenga Siakeng chenna veng Zotlang veng Local Council leh YMA hruaitute chuan vawiin khan thuchhuah intawm siamin an veng tlangval chu pistol in na taka kah a nih thu leh tunah hian dinhmun ngaihtuahawm taka awmin Greenwood Hospital ICU-ah a awm mek thu an sawi a. Pawi khawihtu chu ruihhlo (meth) zawrh avanga a awmna hmasa atanga hnawhchhuah pawh lo tawk tawh a nih thu leh hetiangam ram leh khawtlang duh loh thila inhnawhchhuah ten khawpui laili a pawh rapthlak tak an khawih ngam ta mai chu pawh an tih tak zet tih an sawi a. Pawi khawihna thleng chu an dem takzet thu an sawi a. Pawi khawihtu chuan a phu tawk hremna hmu ngei se an duh thu leh hremna a hmuh ngei theih nan a tuartu Pu Lalrawngbawla Siakeng te chhungkua chu an thlawp tlat dawn thu an sawi a ni.*

*Bawngkawn YMA pawhin vawiin khan thuchhuah siamin an veng thil thleng chu pawh an tih thu leh thinrimthlak an tih thu an sawi a. Rochhingpuia te chhungkua chu zanin zanlai dar 12 ral hmaa an veng chhuahsan nghal tura an hriattir thu an sawi a. Hun tiam chhunga an chhuak lo a nih chuan an chungah eng pawh thleng se an duhthlanna a nih thu leh chhiatni fund leh membership fee pawh an pek let nghal thu an sawi a. Pawi khawihtu Rochhingpuia chu a phu tawk hremna a na thei ang ber hmu se an duh thu an sawi bawk a ni.*



## **SIALHAWK PINEAPPLE**

Mizorama lakhuihthei thar tam ber Sialhawk khua chuan Lakhuihthei hralhna kawngah harsatna an tawh avangin MIFCO in quintal 170 leh kg 88 a leisak tawh.

An harsatna tawh chungchangah hian Sialhawk Pineapple Growers Society chuan MIFCO Chairman Pu Lalhazuala Royte hnenah an harsatna te thlenin, Chhingchhipa MIFCO hmuna sawngbawl turin Sialhawk lakhuihthei leisak turin an ngen a. MIFCO Chairman-in hma a laksakna zarah hian August ni 13 atangin MIFCO ah hian an chung lut a ni.

Kumin July thla khan Guwahati Aromatic Company nen inremna an lo siam tawh angin Quintal 400 an hralh a, kawng chhiat avangin hei bak an thawn belh thei a, Mizoram chhungah Aizawl leh khawpui dangachte lakhuihthei hi hralhin August ni 26 thleng hian quintal 7500 vel an hralh tawh a. Lakhuihthei hi tunah hian Kg. 1 Rs. 10/- in an hralh a ni.

Sialhawk Pineapple Growers Society Chairman Pu J. Rampanmawia chuan lakhuihthei tharchhuah hun lai chu furpui a nih thin avangin harsatna an tawh thin thu sawiin an lakchhuah thinna kawng siam that sak turin sorkar an ngen thu a sawi a ni.

## **Byte of Sialhawk Pineapple Growers Society Chairman....**

Sialhawkah hian lakhuihthei chingtu chhungkaw 250 vel an awm a. Mizoram pum lakhuihthei thar chhuah atanga za zela 64 hi Sialhawk khaw thar chhuah a ni.



## **NATIONAL SPORTS DAY**

National Sports Day pualin Mizoram hmun hrang hrangah hun hman chhunzawm zel a ni a,

Vawiin khan Serchhip District Sports Committee buatsaihin hmun thumah hman a ni a, sports item chi hrang hranga inel a ni a. Serchhip District chhunga Sports Association te bultumin intlansiak buatsaih a ni a. He intlansiak hi Serchhip Sports Complex ah neih niin Lalhlansanga IOC Veng chuan lawmman pakhatna a dawng a, lawmman pahnihna dawngtu chu Lalthatpuia Bazar Hnuai niin C. Lalhlimpuia P&E Veng chuan lawmman pathumna a dawng a ni. Hei bakah hian Serchhip District Mizoram Upa Pawl ten draught board inelna an buatsaih bawk a. Serchhip Boxing Hall ah item hrang hrang - Futsal, kalchhet leh shot-put te hmangin inelna buatsaih a ni. National Sports Day lawmna hi SDO(S) Pi Rebecca Laldinmawii Hrahsel chuan a hawng a. National Sports Day in a tum ber chu mipuiten hriselna ngaih pawimawh nachang an lo hriat thar nan te, nun dan hrisel zawk an lo zir theih nan te, huaisenna leh tumruhna te an lo neih thar theih nan a ni a ti a. Abel Lalawmawia chuan taksa insawizawi pawimawhzia sawiin Fitness Talk hun a hmang bawk a ni.

Indian Institute of Mass Communication (IIMC), North East Regional Campus, Aizawlah pawh National Sports Day pualin IIMC hmunpui Delhi atanga tihtur lo thleng angin hun hman a ni a. National Sports Day puala thutiam lain hemi hnu hian nilengin volleyball, table tennis, badminton, carrom leh chess hmangin naupangte an infiam bawk a ni.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### **PM**

Prime Minister Narendra Modia chuan vawiin khan Shanghai Cooperation Organisation Summit vawi 25-na hmang turin China-a Tianjin khawpui a thleng. Summit hi naktuka tan tur niin khawvel ram hruaitu pawimawh tak takte an kalkhawm dawn a. He Summit ah hian venhimnate, inkalpawhna, hmasawna tluantling leh khawvel ram thawhona chungchangte an ngaihtuah dawn a. Kum 25 chunga Shanghai Cooperartion Organization thlen chin leh kum 10 lo awm tur hmachhawp te sawiho a ni ang.

Prime Minister Modia hian ni hnih chamin hlawhtling takin Japan ah hun a hmang bawk a. Tokyo-a India-Japan Annual Summit vawi 15-naah PM Modia leh Japan PM Shigeru Ishiba te an tel a.

He hunah hian Prime Minister Narendra Modia chuan India leh Japan ten kum 10 lo awm tur chhunga hmasawna tur ruahmanna roadmap an siam a. Heng ruahmannate hi investment, ngaihtuahna thar hman, eibar zawna nghet, technology, mipui inpawhtawna leh an chhehvela thawhona tha zawk neih te a tel a ti a. Pu Modia chuan small and medium enterprise te thlurbik an ni ang tih sawiin Japan

Company te chu Make in India leh Make for the World ah tel ve turin a sawm bawk a ni.



**PM MANN KI BAAT**

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 125-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

